

Атқарылар істер анықталды

Қызметіне кіріскелі ауылдық округтердің тыныс-тіршілігімен танысып жүрген қала әкімі Қайрат Нүкенов бұл жолы ат басын Төртүй ауылына тіреді. Ең алдымен Екібастұз орта мектебіне бас сұққан қала басшысы интернат пен балдырғандар шағын орталығының хал-ахуалына қанықты. Жалпы, 80 оқушы білім алып жүрген мектепті биыл 5 түлек бітіріп, 4-еуі тест тапсырыпты. ҰБТ-дағы орташа көрсеткіш – 96 ұпай. Яғни, шәкірттер сапалы білім алу үстінде деуге болады.

Осыдан кейін қала әкімі мектептің жылумен қамтамасыз етілуін сұрастырды. Қазандық жөндеуді қажет етпейді, ал одан мектепке дейінгі арақашықтықтағы жылу құбырлары биыл жазда ауыстырылады. Тендер өткізіліп, мердігер анықталған.

Жергілікті дәрігерлік амбулаторияда бір дәрігер, үш медбике тұрғындарға медициналық қызмет көрсетуде. Округ орталығы мен оған қарасты шағын ауылдар халқын медициналық тексеруден өткізіп тұру жолға қойылған. Екібастұз қаласындағы №3 емханадан келетін дәрігерлер бригадасының бұл шарада тигізетін көмегі зор. Қала әкімінің: «Қатерлі дертке ұшыраған адамдар бар ма?» - деген сұрағына бас дәрігер Асқабыл Туашев: «Обыр дерті жоқ, екі адам туберкулезден емделіп жүр», - деп жауап қатты. Жалпы, ертеректегідей емес, құрт ауруының азайғаны байқалады. Сонымен бірге, ана мен бала өлімі тіркелмегелі де пәленбай жыл өтіпті.

2014 жылы күрделі жөндеуден өткізілген дәрігерлік амбулатория ғимараты жайнап тұр. Дәл осындай жылы сөзді мұнтаздай ауыл клубына да арнауға болады.

Екібастұз ауылдық округіндегі ірілеу елді мекен – Тай ауылы. Мұндағы орта мектепті биыл бітірген 6 түлек те ҰБТ тапсырудан бас тартыпты. Білімі жеткілікті

екеніне сенбегені ғой. Осы орайда қала әкімі Қайрат Теміршотұлы мектеп директоры Ерсайын Сүлейменовке оқушылардың білім сапасын жақсартуға баса назар аударуды тапсырды. Сөз арасында айта кетейік, былтыр Өлеңті орта мектебін бір оқушы «Алтын белгіге» бітірген екен, келесі оқу жылында да осындай белгіден үміткер бір оқушы бар көрінеді. Соған қарағанда, ұстаздар еңбегі еш болуда деуге келмес.

Мектепте жалпы 57 шәкірт бар. Бастауыш сынып оқушылары бір мезгіл тегін ыстық тамақпен қамтылады екен. Қала басшысы мектеп асханасында болғанында ауылдық округ әкімі Марат Құспеков пен мектеп директоры Ерсайын Сүлейменовке оқушыларды жаппай тегін тамақпен қамтуды жергілікті шаруа қожалықтары көмегіне сүйеніп шешуді жүктеді.

Білім ошақтары ауласын абаттандыру да қала басшысы назарынан тыс қалған емес. Жоғарыда сөз болған екі мектептің ауласына қиматас төселсе, әдемілене түсер еді. Қала әкімі осы жұмыстың жобалық-сметалық құжаттамасын әзірлеуге өтінім жасау керектігін айтты. Егер бюджетте қаржы табылса, ауыл-ауылдағы басқа да әлеуметтік нысандар ауласына қиматас төселіп, жақын тұрғындары арасын тротуармен қосса, тіптен тамаша болар еді.

Тай ауылы клубының жұмысы қала басшысы көңілінен шықты. Мұнда мәдени шаралар мазмұнды өткізіледі. Ауыл өнерпаздары қалалық байқауларда жүлделі орындардан көрініп жүр.

Ауыл тұрғындарының негізгі күнкөріс көзі мал өсіру екені белгілі. Екібастұз ауылдық округіндегі 48 шаруа қожалығы мемлекет көмегіне сүйеніп, төрт түлік тұяғын көбейту үстінде. Қала басшысы Тай ауылы іргесіндегі жалғыз үйлі Алексей Гриценконың ша-



руа қожалығында болды. Ол кезінде «Өлеңті» кеңшарының малшысы болған әкесі Алексейдің орнын басып, кәсібін жалғастыру үшін Павлодар қаласынан қызметін тастап келіпті. Әйтпесе, жоғары білімді дәрігер көрінеді. Өлеңті өзені сағасындағы шұрайлы жерден 50 гектар алқапты жалға алған шаруаның меншігінде бүгінде 70-тей қара мал, біршама қой мен шошқа бар. «Талпақ танау өсіру тиімді» дегенді айтқан Алексей сиыр тұқымын асылдандыруды қолға алуға да ниетті. Биыл екі асыл тұқымды бұқа сатып алыпты. Сонымен бірге, асыл тұқымды құнажындар алу ойымен «Сыбаға» бағдарламасына да қатысқан екен, кепілзатқа қойған Павлодар қаласындағы екі пәтердің құны берілетін несие сомасына жетпей, ала алмапты. Мәселенің мәнісіне қаныққан қала басшысы проблемамен жете танысып, қолдау көрсететінін айтты. Бұл мәселені қадағалау ауыл шаруашылығы бөлімі басшысы Өтен Тоқыровка тапсы-

рылды.

Оқыған жігіт емес пе, Алексей Гриценко: «Ауыл тұрғындары көң-қоқысты мына ойға төгуді үйреншікті жайтқа айналдырыпты. Мен мұнда келгелі тоқтаттым. Осы жиылған қоқыстың көзін жоюға көмек керек», - деп, қала әкіміне өтінішін де жеткізді. Жалпы, қоқыс үйіндісі ғана емес, қалқайып қабырғалары қалған бірнеше баз да табиғаттың сынын бұзып тұр.

Жұмыс сапары үстінде қала әкімі Қайрат Нүкенов ауылдық округ әкімі Марат Құспековке Төртүйде әлеуметтік дүкен ашуды, қала мен елді мекен арасындағы күре жол бойы қапталының тазалығына көңіл аударуды міндеттеді. Десек те, округ тұрғындары үшін жағымды жаңалық та бар көрінеді. Ауыл әкімінің айтуынша, ұялы телефон байланысын қамтамасыз ететін құрылғы монтаждалып жатқан көрінеді.

Суретті түсірген В.Фадеев